

# Statuts da la Giuventetgna Rumantscha (GiuRu)

## I Disposiziuns generalas

### Art. 1

La Giuventetgna Rumantscha è in'uniun surconfessiunala e politicamain neutrala tenor art.60 ss. dal cudesch civil svizzer.

### Art. 2

#### Intent

La Giuventetgna Rumantscha

- cultivescha e promova il contact tranter la giuventetgna da las differentas regiuns rumantschas ed er da la diaspora
- stgaffescha l'encletga tranter las regiuns rumantschas cun sustegnair e promover las activitads ch'interessan la giuventetgna.
- Tschertga e tgira sin plaun chantunal, naziunal ed internaziunal contacts cun gruppas che han sumegliantas finamiras

### Art. 3

#### Commembranza

Commembras e commembers da la Giuventetgna Rumantscha pon esser persunas natiralas tranter 16 e 35 onns che discurren rumantsch sco era uniuns da giuventetgna rumantschas.

### Art. 4

#### Organs

Ils organs da la Giuventetgna Rumantscha èn:

- a) la radunanza generala
- b) la suprastanza
- c) il revisurat

## II Radunanza generala

### Art. 5

#### Cumposiziun

La radunanza generala è l'organ suprem da la Giuventetgna Rumantscha. Ella sa cumpona da:

- a) commembras e commembers tenor art.3
- b) commembras e commembers da la suprastanza

### Art. 6

#### Convocaziun e lieu da radunanza

La radunanza generala ha lieu mintg'onn. La suprastanza u 10 commembras u commembers pon pretender radunanzas extraordinarias.

Il termin è da communitgar 30 dis avant a las commembras ed als commembers e da publicgar en las gasettas rumantschas. Il lieu vegn fixà da la suprastanza, resguardond las differentas regiuns.

**Art. 7**  
**Cumpetenzas**

La radunanza generala tracta e fixescha las directivas generalas da l'actividad da la Giuventetgna Rumantscha. Ella elegia la suprastanza, il revisurat ed incumbensads/-adas per eventualas funcziuns spezialas. Ella deliberescha il protocol da la davosa radunanza generala, il rapport annual da gestiun da la suprastanza ed il quint e rapport dal revisurat. La radunanza generala decida davart la contribuziun annuala.

**Art. 8**  
**Procedura per elecziuns e votaziuns**

Tuttas elecziuns vegnan fatgas cun tschernas avertas, nun ch'in/a commember/-bra pretenda in scrutini. Per tutt'elecziuns e votaziuns vala il pli da las commembras/dals commembers preschents/-as.

**Art. 9**  
**Admissiun ed exclusiun**

Commember/-bra po daventar mintgin/a che sustegna la finamira tenor art.2 e che corresponda a las premissas tenor art.3.

Commembras e commembers che cunterfan a las finamiras da l'unien pon vegnir exclus/as da la radunanza generala.

### **III Suprastanza**

**Art. 10**  
**Cumposiziun ed elecziun**

La suprastanza sa cumpona da 5 commembers/-bras:

- President/a
- Vicepresident/a
- Actuar/a
- Cassier/a
- Assessur/a

En suprastanza duess esser represchentada tant sco pussaivel glied da tut l'intschess rumantsch.

Las personas en suprastanza vegnan elegidas per 2 onns cun il dretg da vegnir reelegidas.

**Art. 11**  
**Incumbensas**

La suprastanza è l'organ executiv ed administrativ da la Giuventetgna Rumantscha. Ella represchenta la Giuventetgna Rumantscha, exequescha tut las incumbensas da gestiun e convochescha la radunanza generala.

**Art. 12**  
**Cumpetenzas**

La suprastanza elegia cummissiuns per incaricas specificas.

**Art. 13**  
**Sesidas**

La suprananza vegn convocada dal president tenor basegn u sche trais commembers/-bras giavischan ina sesida. Las decisiuns vegnan prendidas cun la maioritad. En cas da paritad da las vuschs tar las votaziuns ha il president/la presidenta la vusch da tagl.

## **IV Revisurat**

**Art. 14**  
**Controlla dal quint**

Las duas personas dal revisurat controlleschan mintg'onn il quint da la Giuventetgna Rumantscha e dattan rapport a la radunanza generala.

## **V Differentas disposiziuns**

**Art. 15**  
**Dissoluziun**

Sche la Giuventetgna rumantscha avess da sa schliar, duess la facultad restar deponida durant 20 onns tar la Lia rumantscha e vegnir restituida a l'uniun, per cas che quella sa constituiss danovamain. Cas cuntrari duess la facultad vegnir duvrada per autras activitads da la giuventetgna rumantscha.

**Art. 16**  
**Vigur e revisiun dals statuts**

La radunanza constitutiva da la Giuventetgna Rumantscha ha approvà quests statuts ils 9 d'avust 1991 a Laax. Els entran en vigur cun quest termin. La radunanza generala po reveder quests statuts cun in pli da 2/3 da las vuschs preschentas.

Laax, ils 9 d'avust 1991

Per la Giuventetgna Rumantscha

Il president  
Roman Cathomas

L'actuar  
Chasper Alexander